

Peqatigiiffiit eqquiniaasitsineranni (lottornermi bingornermilu il.il.) akileraarutininik akiliuteqartarunnaarsillugit eqquiniaasitsinermi akileraarutit pillugit Inatsisartut inatsisaanni § 1 imm. 4-p allangortinneqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Akileraartarunnaarsitsineq aningaasanoorutininik pinnguarnermi eqqukkanut atuutsinneqassanngilaq.

(Inatsisartunut ilaasortaq Jens Immanuelson, Siumut)

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

Siunnersuutip aappassaaneernejarnerani saqqummiunneqartoq

Aningaasaqarnermut Akileraartarnermullu Ataatsimiititaliaq suliarinninnermini ukuningga inuttaqarpoq:

Inatsisartunut ilaasortaq Jens Immanuelson (Siumut) siulittaasoq

Inatsisartunut ilaasortaq Steen Lyng (Atassut) siulittaasup tullia

Inatsisartunut ilaasortaq Jess Svane (Siumut)

Inatsisartunut ilaasortaq Tillie Martinussen (Demokraatit)

Inatsisartunut ilaasortaq Naaja H. Nathanielsen (Inuit Ataqtigiiit)

Inatsisartunut ilaasortaq Sara Olsvig (Inuit Ataqtigiiit)

Inatsisartunut ilaasortaq Peter Olsen (Inuit Ataqtigiiit)

UKA 15-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Inuit amerlasuut peqatigiiffilerinermi qasusuillutik suleqataasarnert siunnersuuteqartup siunnersuumminut tunngavilersuutigaa. Siunnersuuteqartup tikkuarpaa bingortitsinerit, eqquiniaasitsinerit assigisaallu aqutugalugit peqatigiiffiit aningaasaqarnerminnik qulakkeerinnittartut. Siunnersuuteqartup oqaatigaa inuit pinaveersaartitsiniarnermik suliaqartut sunngiffimmini peqatigiiffinnik ingerlatsisuusarmata aammalu suliamik annertuumik kivitsisarlutik, minnerunngitsumik peqatigiiffinni timersornermik ingerlatsisuni aammalu meeqqanut inuusuttu-nullu tunngasunik annertuumik suliniarnermikkut pinaveersaartitsinerimut peqataasarmata. Siunnersuuteqartoq isumaqarpoq peqatigiiffinnut aningaasannaniartitsinerit piffissamik atuffiisorujussuusartut, taamaammallu peqatigiiffiit eqquiniaasitsinermi akileraarummik akilii-sinneqartarunnaarnissaat siunnersuutigaa, peqatigiiffippassuimmi piffissarujussuaq atorlugu

angalasarnerminnut aningaasassarsionernik ingerlatsisarput, taamaalillutillu nukippassuarnik siunertanut allanut atorneqarsinnaagaluartunut atuisarlutik.

2. Ataatsimiititaliap siunnersuummik suliarinninnera

Siunnersuut siullermeerneqarmat assigiinngitsunik isummersorfigineqartoq ataatsimiititaliamit maluginiarneqarpoq. Naalakkersuisut siunnersuut tapersinngilaat, Siumulli Atassutillu siunnersuut taperserlugu aammalu siunnersuutip taasissutissartaa naleqqussarneqarsinnaappat Inuit Ataqatigiit akuersaarnartitsillutik.

Naalakkersuisut naliliipput atorunnaarsitsineq peqatigiiffinnut eqquiniaasitsinermi eqquisunut eqqukkaniq tunniunneqartunut akileraarutiniq unerartitsinngitsunut peqatigiiffiulli sinneqartoorutaanit akileraarutiniq akiliuteqarnissamik toqqaasimasunut taamaallaat pingaaruteqartoq - tamatumalumi kingunerisaanik peqatigiiffiup eqquiniaasitsinerani isertitat ikilissammata.

Inuit Ataqatigiit isumaqarput eqqugassat annikinnerusut pineqartillugit akileraarutissanik naatsorsuiniarneq peqatigiiffinnut pisariaqanngitsumik pisarissersuutaasartoq. Akileraarummut akiliut tamakkiisumik piinngikkaluarlugu peqatigiiffiit allaffissornikkut sutigut oqilisaaffigineqarsinnaanerit pillugu misissuisoqassasoq Inuit Ataqatigiinnit kissaatigineqarpoq. Inuit Ataqatigiit siunnersuutigaat inatsimmi eqqukkanut minnerpaaffiliussa qaffanneqarsinnaasoq. Tamatuma peqatigisaanik Inuit Ataqatigiit oqaatigaat siunnersuut aningaasanoorajunnerup annertusarneqarnissaanut peqataaqaataassanngitsoq.

3. Siunnersuutip aningaasatigut kingunerisassai

Naalakkersuisut naliliinerannit allannerusumik naliliinissamut ataatsimiititaliaq tunngavissaqarsorinngilaq.

4. Ataatsimiititaliap inassuteqaatai

Peqatigiiffippassuit namminnerlu kajumissutsiminnik nunatsinni sullissisorpassuit Inuit Ataqatigiinnit qujassuteqarfigiumavavut. Siunnersuutip siullermeerneqarnerani Inuit Ataqatigiit kaammattuutertik uteqqikkumavaat, tamatumani peqatigiiffiit qinnuigaagut siunertanut pitsaasunut aningaasannanniarnermi aqutissanik nutaanik ujartueqqullugit. Isumaqarpugut aningaasanoorajunneq inuiaqatigiinni ajornartorsiutaasoq annertoq imaannaanngitsorlu, tamatumalu akiorniarnernani tamatta peqataanissarput kissaatiginarluni. Assersuutigalugu qititsitsinermik nipilersornermillu, pinnguaatinik ataatsimoorussanik, iffiukkanik sanalukkannillu, aputaajaanermik il.il. aqqissuussinerit aqutigalugit aningaasannaniartoqarsinnaavoq – aqqissuussinerni taakkuni tamani aningaasanoorneq imigassarluunniit akuunngillat. Neriuppugut oqaatsivut peqatigiiffinnit tikilluaqqulluarneqarumaartut.

Siunnersuut taama iluseqartoq **itigartinneqassasoq Aningaasaqarnermut Akileraartarnermullu Ataatsimiititaliamit amerlanerussuteqartut Inuit Ataqatigiit Demokraatillu inassutigaat.**


Ataatsimiititaliami ikinnerussuteqartut Siumup ilaasortaataat siunnersuut pillugu ima oqaaseqassapput. Sunngiffik atorlugu peqatigiiffinnik ingerlatsisunut tapersersuinnginnissamut

akissaqanngilagut. Siumup pingaartitarai sunngiffik atorlugu peqatigiiffinnik ingerlatsisut. Taakkuuppullu ullorpassuit unnuppassuillu atorlugit inuppassuusugut sinnerluta susassa-qartitsinermik ingerlatsisut.


Tamanna pillugu immikkoortumut qulaani taaneqartumut ilaliilluta oqaaseqarsimanitsinnut ikinnerussuteqarluta matumuuna nalunaarutigissuarput. Siumumiit akuersaarsinnaanngilarput pingaartumik meerartatsinnut inuusuttuarartatsinnullu sammisaqartitsiuartut akileraartarnikkut inatsisikkut pineqaatissinneqartussanngorlugit

Siunnersuut Inatsisartunit **akuerineqassasoq ataatsimiititaliami ikinnerussuteqartut Siumup Atassutillu ilaasortaataitaasa inassutigaat.**


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Jens Immanuelson,
siulittaasoq




Steen Lynge




Jess Svane




Tillie Martinussen



Naaja Nathanielsen



Sara Olsvig



Peter P. Olsen